

續
文
獻
通
考

續文獻通考卷之七十五

皇明進士雲間王圻纂輯

節義考 節婦三

元

劉氏伏羌張忠妻年二十夫亡守節終身至元三年旌表
周术忽妻崔氏元初從忽官平陽金將破平陽令官屬妻
子敢匿者死時忽以使事在上黨崔氏即抱幼子禎詭
言于將將信之使軍吏書其臂出之崔氏不使吏執臂
自揜袖吏懸筆而書旣而將知其詐追之伏土窖三日
得免與术忽會未幾术忽亡崔年二十九大慟柩前誓
不更嫁有謀娶者乃自爬毀其面四十年不妄言笑人

以比古烈婦云

薛世榮妻韓氏河內人世榮歿時年二十一孀居守節年七十八而終至元五年旌表其門

王傑妻盧氏溫縣人年二十傑亡志行貞潔終始如一至元五年旌表其閭

張興祖妻周氏澤州人少年守節其祖母及母並以貞節著人或勸改適曰不孝不義吾不爲也居嫠三十年舅姑與父及外祖皆盡瘁祭禮詔旌其門

陳氏韓城人適邑人孫謙生子景仁甫一歲而謙卒氏方十九誓不易節至元十六年旌表其門

李氏涇陽人符文進妻年二十六文進卒誓不再嫁至元

中詔旌其門

任建妻王氏尉氏人建仰弋林中墜矢中面而死時王年二十三一子尚在襁褓父母憐其早寡欲嫁之王曰任氏有後豈忍背之誓不他適歷四十餘年而終至元間事聞詔旌其門

李氏南豐人曾聞妻夫死守節至元壬午葫蘆峒寇猝至甘言誘之大罵賊而死

段氏隆興人霍榮妻榮卒段氏年二十六止有養子而諸父貪其產逼段再醮使養子歸宗段引針刺面墨漬之誓死不二大德初旌其門

吳氏興和人夫死自刺其面誓不改嫁詔旌其門

謝思明妻趙氏成紀人夫死自髡其髮誓不再醮詔旌其門

田濟川妻武氏冀寧人曹子英妻尤氏溧水人夫亡皆嚙指滴血誓不再嫁各旌其門

霍氏二婦俱鄭州人至元間尹氏夫擢卿歿姑命其更嫁尹曰再嫁失節妾不忍爲也姑不能強楊氏夫顯卿繼歿慮姑欲其嫁即先曰婦願與尹共修婦道姑曰汝果能如是吾何言哉於是同處數十年節孝著聞于世

王氏懷安人歸爲同邑吳氏婦年二十有九而寡守志不
二大德五年旌表門閭

李君用妻王氏遼陽人大德八年哭夫而死

耶律忽魯不花妻移剌氏夫同知湖州路事旣歿割耳自誓廬墓側不食死

謝氏上猶人名十九娘邑徐仁妻年三十夫死夫黨有徐祥者陰許爲富家妾謝聞之悲慟自縊而死大德間廉訪司至縣祭之表其墓曰貞婦

闕文興妻王氏名醜醜建康人至元中文興從軍漳州爲萬戶府知事會陳弔眼作亂文興戰死王氏爲賊所執逼汚之紿曰收葬吾夫然後惟命及得夫亂屍中積薪焚之亦投火死大德中漳州路上其事下詔旌其門仍封文興英毅侯王氏貞烈夫人立廟祀之賜額雙節

溧陽甘士人妻大德丙午士人挈妻館寓句容潘家村值

歲荒績網給食一日夫携網出賣不復還人有利其色
爲給食因欲私之婦正色曰我非如是人也其人謂我
不汝給汝亦餓死矣婦曰我寧餓死誓不苟生閉戶益
嚴彌月人開視之則已死矣

丁氏新建人鄭伯文妻大德時伯文病時丁與訣曰君脫
有不諱妾當從但君父母已老妾且忍死以奉其餘年
必不負君伯文卒丁氏年二十七始終不改節事舅姑
盡孝事聞詔旌表其門

郝氏永壽人田大妻胥氏田二妻周氏田三妻兄弟三人
俱死于兵郝年二十一周年十八胥年十九俱堅心守
節終身不嫁延祐二年旌表時邠州任氏亦一家三婦

少寡不他適戮力蚕桑以養舅姑俱被旌

范遇時妻顧氏旣嫁而早寡育孤謹節垂四十年延祐間
事聞旌表其門

關氏鄜州人孫世昌妻年二十三而世昌卒守志不渝六
十年延祐中旌表

熊氏南城人喻克成之妻克成早卒熊氏始終不虧婦節
至治間旌表其門

宋天民妻陳氏汝州人年二十五而夫亡乏嗣誓不再適
守節三十六年始終不渝至治中旌表其間

譚拱辰妻黃氏夫喪年幼子景星甫四歲堅白自持訓其
子起家永明教諭以孝行稱延祐泰定中母子俱旌

余氏名正順昌人年十六父從周許妻黃壽明年將樂土豪伍馬榮者欲強娶之余氏告其父曰既受黃聘即黃婦也吾寧死而不失節父以其辭辭之又明年歸黃黃迎之土豪遣百餘价俟于道殺黃而奪余氏余氏給其价還乃扶黃柩歸白于官土豪坐誅遂卜地葬其夫自殺以從時致和己巳歲也

趙彬妻朱氏洛陽人名錦哥天曆初爲西兵所掠將犯之朱度不能脫即紿之曰幸釋我舍後井傍瘞金發以遺汝西兵信之朱得近井即抱三歲女赴井死

羅五十三妻貴哥蒙古人五十三同知宣政院事天曆初以罪竄籍其家以貴哥賜近侍卯罕貴哥自經死

杜友開妻吳氏江陰人友開儒者家貧教授吳辟纁助之
天曆間歲歉友開竟餓死吳昆弟欲挈吳以歸吳以義
折之遂相枕籍而卒

馬奔妻胡氏名順奴順德人奔死自縊殉葬至順元年詔
旌表其門

黃景立妻彭氏永豐人年十八生一子景立亡斷髮誓不
改適至順間詔表其門

哈刺不花妻脫脫尼雍吉刺氏蒙古人不花死前妻有二
子欲以本俗收繼脫脫尼恚且罵乃謝罪

李世安妻王氏成都人世安卒弟世顯欲收繼之王氏引
刀斷髮割耳親戚爲醫療百日愈旌其門

臺叔齡妻劉氏順寧人一日地震屋壞壓叔齡不能起家復失火叔齡母往救不得欲就焚叔齡望見妻呼曰吾已不得出當亟救吾母劉謂夫妹曰汝救汝母汝兄已死吾無用生矣即自投火中死火滅家人收二屍燼中手猶相握

江文鑄妻范妙元奉化人年二十一歸于江及門未合卺夫忽以癩疾卒范誓曰我旣入門即江氏婦也遂居江氏家守節撫諸姪如已子

趙美妻王氏內黃人至治初美溺水死王誓守志舅姑念年少無子欲使更適人王曰婦義無再醮安可棄而去舅姑欲以族人繼婚王不從舅姑逼之王即自經死

趙慶妻高氏新安人年二十一慶亡子幼高躬親耒耜撫育其子以成立元統三年旌其門年九十五而卒

唐斗輔妻文氏靜江人大德中斗輔任賓州幕官卒時文氏年方二十餘哀慟幾絕執義自誓孝養舅姑舅姑既沒葬祭無遺憾其子明蚤世婦將氏慕姑之義亦自誓靡他至治中旌其門曰貞節

向氏二婦宜都人存仁妻張存禮妻杜各一子二婦年皆未及三十堅守節義至元中旌表其門曰節義

花山節婦高淳人失其姓氏至元間爲兵所逼至崇賢鄉碑亭橋嚙指濡血題詩亭上有云遙望花山何處是遂自縊鄉人哀恤之因名花山節婦

陳端才之妻蔡氏三王龍溪縣澳里人後至元間本處寇起掠其里里媼集里中婦女同舟避難寇追及三王亟以水漬衣冠視王有姿色欲先污之三王紿曰衣濕更求衣冠取衣遂投水死

楊氏鄜縣人閭頑妻頑卒楊甫二十二歲誓志守節約五十年至正元年詔旌表其門

楊氏名潤字妙光處之麗水人適葉河早卒年始二十一守節三十一年卒至正時旌其閭且復其役

蘇守義妻齊氏安平縣新莊人守義病篤謂齊曰我即不諱爾年少可善事後人齊曰烈女不懷二心及死即死以殉有司上聞旌曰死節之門復其徭役時至正六年

郭氏台州午夫長李某部卒妻李見郭氏有令姿心慕焉去縣七八十里有盜出沒李分兵徃戍卒遂在行旣而日至卒家調之郭毅然莫犯經半載夫歸具以告一日李過卒門邀入具茗轉身持刃出李幸脫走訴縣捕問傳死罪桎梏囹圄郭氏躬餽食于卒閉戶績紡以資衣食人不敢一至其家久之獄卒葉姓者尤有意于郭氏乃顧視卒日飲食之情若兄弟遂謀之于卒欲以爲妻卒喜諾郭氏曰汝之死以我色我又能二適以求生乎旣歸持二幼痛泣遂携出市召人與之人有憐之者納其子女贈錢三十緡郭以三之一具酒饌携至獄哽咽不能語旣而曰君擾押獄多矣可用此答之又有錢

若干可收自給我徃一富家執作糊口恐旬日不及看
君也垂泣而別走至仙人渡溪水中危坐而死見者報
縣爲具棺殮葬所死之側山下上司表其墓曰貞烈郭
氏之墓至正六年朝廷遣使廉得其事原卒初情釋之
一說郭貞婦齊義妻也義酗酒刺其千夫長不死事覺
當流於廣郭以廣多瘴度義不能生還乃歸其女於童
氏送義出郭顧天赴水而死收其屍則端坐水中顏色
不變衆因立祠祀之

李青妻張春兒葉縣人年二十而青疾革顧春兒曰吾殆
矣汝善事後人春兒斷髮示信誓不再醮尋青卒春兒
號慟幾絕囑其梓匠曰造棺宜極大將以盡納亡者永

服弓劍之屬匠如其言既殮乃自經隣里就用此棺同
葬之至正八年旌表其墓

毛氏名清娘早適人至正九年寇亂闔門走避毛氏竟不
能脫遂大書其壁云寧死義不從賊賊至毛氏以利刃
刺賊首遂爲所殺

史五妻徐氏定遠人五爲義兵百夫長至正十年暴兵至
五戰死徐氏求夫于積屍中莫能識以口吮血辨驗得
載歸治大棺以殮乃沐浴自經死

王相妻潘氏霑化人其舅王伯顏死節于福寧州城陷潘
爲賊所執不食而死追封太原郡夫人

程晉妻彭氏偃師人寓居開興壬辰兵變軍士驅迫使隨

彭給之曰我有金若干私瘞于家爾可取之願以從行賊拘少懈至井彭大罵曰吾良家婦肯自愛其生以汚身耶遂投井死鄉人號曰烈婦

李氏永新彭九萬妻至正十二年紅巾至李及其子女俱被執脅以白刃欲犯之李罵賊而死

鄧氏崇仁周九成妻至正壬辰盜起被執欲汚之罵而死楊用霖妻蕭氏子婦劉氏隣婦陳氏鄧氏壬辰寇起懼爲所汚俱投井死

徐氏張孟庸妻德興人壬辰盜欲納徐哭曰芳谷吾祖也夫被爾殺反又事之豈不辱吾祖乎沉水死

王氏德興人壬辰盜起王在室或強娶之赴水死

唐氏龍泉項惠可妻至正壬辰紅巾寇亂惠可具舟遠避甫及新林寇奄至唐見事急與其母俱赴水死

鄺維禎妻曾氏教城人至正壬辰紅巾寇至教城執曾氏欲妻之不從俟間自盡

萬氏樂安人曾希仁妻生三女至正壬辰之亂母子四人恐爲盜所辱俱縊死又聶貴妻劉氏王仁妻劉氏蔣恒妻劉氏俱樂安人守節被旌

黃氏譚友妻餘干人紅巾之亂殺其夫與父母兄弟欲污之赴火死

友蘭王妻葉氏閩人至正壬辰王死于戰紅巾萬戶毛壽素慕蘭王德欲庇其母子葉義不受庇携子赴水死

鄭氏建寧路照磨雷景炤之妻紅巾寇亂剽掠其村落景炤及父俱爲賊所害鄭有容色義不受辱遂自殺次日復甦竟全節終

朱至直妻袁氏豐城人壬辰兵變遇寇投水死

劉節婦冀之衡水人通古文孝經小學適同郡曹泰時紅巾陷河朔因避兵聊城村賊掩至大掠見節婦居群人中特妍整持刀驅之行節婦曰吾婦人惟知從夫而已不從賊也賊欲移其心乃盛陳金玉珠璣仍以錦繡衣服被節婦身裂碎之強擁上馬墮地者數四賊怒繩其項就馬上曳之節婦以手爬地以頭觸石流血罵不絕聲遂遇害

史氏溧陽人元末遭紅巾之亂舉家被害以刀自刎不絕
乃抱子入水死

段氏史宛妻餘干人紅巾亂其僮欲犯之殺一女罵不從
又殺一男罵不從竟死焉

粉娘南豐人年十八值紅巾掠去不從賊怒殛死之

王弘妻李氏安陽人至正間紅巾賊起弘亡于兵李收尸
發喪晝夜哭泣李頗有姿部人爭求爲妻李以死自誓
人知其不可干乃白于帥帥許之李度不能支佯曰必
待卒虞之後求者諾之迨期遂飯僧大作佛事散家貲
翼日清晨引一老婢徑往天寧寺登浮圖絕頂自投而
死衆皆駭愕瘞于西門外築土爲臺高數尺以旌節婦

童氏俞士淵妻嚴州人至正十三年賊陷威平剽掠至士淵家童氏以身蔽姑衆欲污之童氏大罵不屈一卒以刀斷其左臂愈不屈又一卒斷其右臂罵猶不絕乃抉其面而去明日死

黃氏泰寧邑士元實之女至正十三年鄉惡少爲亂元實遇害黃氏被髮跣足奔父死所抱屍哭踊賊憐其色欲污之黃氏罵不絕口亦遇害

陳氏名道回古田蔣國秀妻至正十三年紅巾賊攻破縣治國秀親族俱被殺道回見太姑蘇妙仁爲賊所擒懇告願代其死賊殺其太姑執道回義不受辱自刎而死邑上其事于朝旌表其門

王氏惠士玄妻大都人至正十四年夫病嘗糞夫死育妾子自守妻子復死曰無復望矣自經于墓樹下

費隱妻王氏良鄉人夫病嘗糞夫死撫其子女已而子又死女稍長以管鑰付之遂相抱慟哭縊死園中

潘氏汪琰妻婺源人琰卒誓不他適以夫仲子元圭爲後元圭孫燕山妻李氏燕山兄子惟德妻俞氏皆早寡矢不他適人稱汪氏三節

蔣氏歙縣吳子恭妻夫亡孀居五十年年七十八卒至正十四年旌

李哥潮州倡女年十二三時母教之歌舞泣不肯學母告以業不可廢哥曰若此聽母母亦當從我好否則有死

已爾母陽許之因是不粉澤不茹葷所歌多仙曲道情有召者先詢主客姓名然後往人亦相戒毋戲狎哥凝立筵前酒行歌闌目不流盼與之酒弗飲州判官嘗忤哥徑還誓不與見孟津縣達魯花赤厚賂哥母夜抵舍哥懷利刃閉卧內罵之曰汝職在牧民而狗彘之不若可急去不污吾刃矣慚怒以回明日知州聞之嘆曰州有貞女而吾不知是一失也吾次子明經舉秀才真若配以禮聘娶之未幾紅巾入寇夫婦被執見哥妍麗將殺其夫哥走前抱夫項大呼曰吾斷不從賊求活寇并殺之

李賢卿妻王氏至正十五年旌表

鄧氏名貞定金谿葛絳妻年二十八居孀至正十五年鄉
寇至執欲污之罵而死

樂壽孫妻劉淑靜鄧人歸壽孫三年壽孫溺死同載者多
不得屍劉氏生男甫周歲抱之沿流上下仰天哭而求
屍屍忽自浮得歛葬焉時年二十九勤苦守志撫孤成
業旌其門

張定山妻婁道真范淦妻董守貞謝德政妻仁和陳氏張
穀寶妻祝清皆以守節被旌

吳興祖妻呂氏歙人至正丙申夫婦避亂黃山遇賊興祖
走賊執呂欲污之不屈遇害

吳克妻戈蘭丹徒人年十八歸克至正十六年賊攻城將

破懼辱投井死時年二十一

劉節婦泰州城人至正丙申春隨父渡江居吳門適張士誠部將曹某方數月夫陣亡劉不避凶險躬至死所求得其屍歸葬欲以身殉父不許旣而權貴人聞劉美且賢爭欲強委禽焉劉誓死不二遂削髮爲比丘尼黃氏名妙姝松溪人至正丙申青田寇侵縣治黃氏時方盛年與群婦逃山谷間爲盜所執義不受污哀哭而伏地不行賊怒驅迫以前行數里經高崖數十丈遂投崖下盜意其必死舍而去至暮其夫蹤跡之得于崖下幸不死遂昇而歸鄉黨高之

江必大妻朱氏至正間喪夫無子遭亂至拾草根樹皮爲

食竟以節終

丁尚賢妻李氏汴梁人年二十餘有姿容至正中賊至欲虜之李怒曰吾家六世義門安能從賊以辱身乎於是闔門三百餘口皆遇害

高恪妻段氏安陽人奉祀郎思謙女既歸高氏婦道毋儀鄉人範馬至正間寇掠村鎮家人悉奔竄段投井而死年二十有八

張政妻秦氏臨漳人至正間兵至投井而死有司上聞旌表其門閭

張和妻王氏溧水人年未三十而和卒黃截髮誓不改節撫孤子玉成立至正間旌表

王容妻陳氏溧水人與其妻汪氏俱年少容死于幼至正間淮兵陷城邑方脅二氏不從俱餓死後當道嘉之贈貞烈

王氏鄜州人康德明妻年二十而德明卒半月生遺腹子育孤守節至正中旌表

張氏鄜州人賀敏妻敏年二十四疾卒張即自縊同穴而葬至正中旌表

婁氏定遠人于氏婦年二十餘至正中爲亂兵所驅義不受辱赴濠水而死

鄭氏呂氏歙人俱爲程氏婦至正間兵亂鄭呂匿千里之王鎮橋呂有姿容卒至虜之鄭力救拒卒怒斬之因以

懼呂呂大罵不屈并遇害

羅宣明妻蔣氏歙人至正間蘄黃盜起蔣氏往依兄弟于香山寨賊攻寨破蔣氏以二子屬其僕出遇賊力拒罵曰死狗奴何不殺我賊斫其臂墜崖而死

齊氏太原人適王履謙至正中賊陷太原齊氏與蕭呂二婦及二女避難趙莊賊至度不能免顧謂二女曰汝家五世同居號曰清白豈可辱身以苟生哉長女曰吾夫已死今得死爲幸呂曰吾左丞孫也義不受辱乃與二婦二女及二孫女俱投巖下死

張氏太倉人年十七始贅周某爲夫夫之父爲百夫長嘗與同伍謀刺其帥事泄罪連其子及婦將斬之帥之子

惜張姿容曰能從我即活張忿罵帥子憤而殺之

范氏名回松溪人葉彥寬妻至正間彥寬得授政和縣簿
未任而歿范氏年未三十子一尚幼誓不履二庭有介
婦同居新寡將改適范氏力諍不聽乃獨撫其子以居
子既長從成又撫其孫孀居五十年餘終始如一節人
無間言壽八十

田氏渾源知州劉仲亨妻生一子彬年七歲至正間仲亨
卒田氏年未三旬遂自經喪側事門旌表其門

趙野妻柳氏薊州人野爲戶部主事未合卺而野卒柳誓
不再嫁病不服藥曰我年二十六寡今年逾半古死可
矣遂卒

姜善諒妻王氏新泰人至正間夫卒自縊

卽氏奉新人余文佐妻至正中渠寇虜掠鄉里縛文佐殺之尋驅費氏欲汙焉投潭水而死

姜本道妻彭氏弟本源妻葉氏至正中道源兄弟爲賊黨余祐二所殺彭與葉訣曰我夫旣死賊必見辱俱死之焦士廉妻王氏博興人養姑至孝至正中毛貴作亂爲官軍所虜王氏給取藏金于墓所至則罵曰我欲死墓旁耳與妾杜氏皆遇害

趙氏女平陽人年二十未嫁爲賊所執給賊取藏金自投于廁而死

李宗顏妻夏婉常富州人與女避賊後園中賊至共投井

死

阿魯溫氏僉事赫赫妻夫亡既葬不食五日而死至正間旌其廬

姜氏開州谷有源之妻夫卒自縊死至正未旌表

毛氏婦胡氏武定州人至正中姑與婦同爲賊所執義不受辱罵賊而死旌曰雙節

楚錫妻鄭氏杞縣人夫亡時鄭年二十三哀毀幾絕以禮營葬遺子咨哲幼弱鄭紡績自給守節四十七年至正間事聞旌爲貞節之門仍命月給衣糧

也先忽都蒙古欽察氏大寧路達魯花赤鐵木兒不花妻以夫恩封雲中郡君夫免官居大寧至正中紅巾賊至

忽都與妾王蓮走尼寺中爲賊所得令與衆婦縫衣拒不肯曰我達魯花赤妻不能爲賊作針工遂與王蓮俱見殺先是其子完者帖木兒與父出城見執于賊完者拜哭請代父死賊愛其姿秀遂挈以從後獲脫歸訪母屍并王蓮葬焉

呂彥能姊及妻女陵州人至正中賊犯陵州彥能姊贅居寓其家先曰我喪夫二十年又無子不死何爲赴井死妻劉氏語彥能曰妾爲君家婦二十八年茲逢亂離必不負君亦入井二女及子婦王氏二孫女皆隨溺一門死者七人

劉公翼妻蕭氏濟南人至正中毛貴將陷城慮不免謂夫

曰妾詩書家女當作清白鬼于泉下城陷解條自縊死
趙洙妻許氏湯陰人有壬姪女洙時爲儒學提舉同避賊
資善寺洙先被殺許氏不知賊甘言誘百方終不從已
而知夫死慟哭仆地罵不絕口遂遇害寺僧哀其貞烈
與洙合葬之

張正蒙妻韓氏紹興人正蒙爲湖州稅務提領至正中紹
興兵變正蒙與韓氏俱縊死女池奴年十七投崖死
余同祖妻曹氏茶陵人至正中城陷自剄死妾抱持不得
亦自剄死

卓氏尤溪施九泰妻嫁未幾九泰卒卓以死自誓遺腹生
一子紡織勤劬以供衣食教其子成立至正中有司以

聞詔旌表復其家

杜氏卽友直母年十八夫卒誓不改節至正間旌爲母慈
子孝之門

關惟一妻周氏登封人至正間夫病死周時年二十四囑
工造棺須大潛自縊而死與夫同棺葬之

蔣義甫妻許氏妾張氏益都人夫卒皆守節至正十七年
毛貴兵亂俱投井而死

韓軌妻邢氏安陽人至正十七年盜陷河朔時軌知林州
守黃華砦盜攻之甚急邢語其女曰恐事不濟吾與汝
必受辱遂俱投崖而死

謝氏諱蒂金華人適蘭溪吳履至正十八年師破睦州遊

兵四出虜婦女芻度不能免抱女投崖下死宋濂有傳
濂女弟嬖值是變亦以秉節沉淵死

王時妻安氏名正磁州人至正十九年時以叅知政事分
守太原正從之明年賊兵寇太原城陷衆皆逃正與妾
李氏同赴井死事聞贈梁國夫人諡莊潔

陳氏名三長樂人嫁同鄉柯宗實至正二十年海賊劫石
梁宗實適在縣郭陳氏將逃避念其父疾弗能遠致奔
往省之與賊遇執焉陳氏且行且罵賊怒亂搯之驅至
舟置之蓬上使其徒守之陳氏乘間赴水死

李弘益妻申氏冀寧人至正二十年賊陷城投井死再娶
安氏二年而弘益卒安氏膏沐薰香自縊柩側

胡氏岷縣剡溪人諱妙端適同邑祝某至正春爲苗獠虜至金華縣將妻之義不受辱乘間嚙指血題詩壁上已赴水而死三月二十四日也獠帥服其節爲立廟祀之邑人咸曰烈女廟詩曰弱質空懷漆室憂搜山千騎入深幽旌旗影亂天同慘金鼓聲滛鬼亦愁父母劬勞何日報夫妻恩愛此時休九泉有路還歸去那箇雲邊是越州

趙宗澤妻衡氏金陵人少有志操時汝穎兵起攻陷建康衡與趙棟妻夏氏趙楷妻劉氏俱誓不受辱沉水而死時號三烈

余忠宣公夫人蔣氏廬州人公守安慶時城陷夫人率其

女福童赴水死

楊和卿妻尼氏益都人夫早卒守節毛貴兵陷益都自縊而死

劉朝綱妻段氏宋氏俱益都人綱爲山東行省理問卒俱縊以殉

管氏政和張子方妻至正末礫寇入邑邑人子女多驅迫以去管氏時年二十餘遂自刎死

陳氏光澤危萱妻至正末寇陷杉關驅掠鄉民男女陳氏與萱俱被執賊索金帛不愜其欲萱被害脅陳氏去陳氏罵不從亦被害

劉氏名愈娘沙縣劉國美妻至正末江西寇鄧克明攻破

縣治愈娘失夫所在奔匿草莽間爲賊所掠迫以行至
安濟顧謂同行諸婦曰吾寧死不受辱遂抱懷中子投
河而死通判劉總以聞詔旌其門

柯節婦陳氏長樂人至正中爲賊所執罵不已忽振厲自
投江中屍逆流而上夫驗其背有黑子昇歸殮之

李馬兒妻袁氏瑞州人至正二十二年李病沒袁氏年十
九誓不再嫁有主成者挾勢欲強娶之遂縊夫墓

王世明妻李賽兒房山人至正二十五年竹貞軍至縣李
氏及其女皆被執李氏謂其女曰與其受辱不若死女
曰母先殺我李氏先殺其女而自殺竹貞爲葬祭仍書
其門曰王世明妻李氏貞節之門有司上其事爲樹碑

陶宗媛杜思綱妻台州人早寡守節賊至護姑柩不去賊迫脅之曰任汝殺我從先姑地下耳遂遇害妹宗婉娣王淑皆赴水死

高麗氏宣慰副使索羅帖木兒妻至正二十七年夫死于兵積薪自焚

丑閭妻侯氏閭爲賊所殺以布囊囊其屍昇至其家侯氏出大哭且列酒肉滿前渴者令飲酒饑者令食肉以紿賊之不防已至夜自縊死事聞贈閭河南行省叅將侯氏寧夏郡夫人表曰雙節

馮三妻閭人不知何氏三不從賊賊剛之妻隨三號泣俯拾封肉納布裙中伺賊遠收三血骸脫衣裹之大泣投

江而死

三事詳見忠義考

朶里不花妻妾蒙古人不花拜江西行省叅政土寇金榮作亂不花死其妻卜顏氏妾高麗氏在側不去皆大罵曰我平章遇爾父子至厚何暴逆至此皆遇害

普顏不花妻阿魯真蒙古人 大明兵至山東不花死阿魯真歷呼家人告之曰我夫受國恩我亦封夫人今事至此惟有死耳已而不花二弟之妻各抱幼子及婢妾溺舍南井死井已填塞阿魯真遂抱子投舍北井女及妾孫女皆隨溺焉

張思孝妻華氏大同人爲鴈高兵所執以不受辱見殺其婦劉氏大罵不已賊并殺之死後姑婦手猶相持

觀音奴妻卜顏的斤蒙古氏宗王黑間女大都被兵謂夫
曰我國族且年少必不容于人自縊死

張棟妻王氏大都人被兵語家人曰吾狀元妻義不
可辱赴井死其姑哭之慟亦赴井死

安志道妻劉氏順州人軍欲污之劉氏曰我弟與夫皆進
士豈受汝辱軍士以兵摩其體劉氏大罵乃斷其舌而
死

宋謙妻趙氏大都人城破趙氏子婦溫氏高氏孫婦高氏
徐氏皆美色合謀曰兵且至我等豈可苟全趙即自經
死諸婦四人諸孫男女四人衆妾三人皆赴井死

王宗仁妻宋氏永平人進士宋聚女從夫避兵俱爲軍虜

行至玉田縣有窺其色美欲害宗仁者宋氏顧謂夫曰
非必不以身累君携一女投井死時年二十九

徐獠頭妻岳氏大都人城陷夫婦同赴火死其母王氏二
女一子皆抱持赴火死

朱氏黃仲起妻杭州人至正中張士誠寇杭州其女臨安
奴先別母求死俄賊驅諸婦至其家且令朱氏母子看
守朱氏懼受辱與女及妾馮氏俱縊死仲起嫂蔡氏抱
幼子玄童與乳母湯氏皆自縊

韋雍妻蕭氏沂州人元末兵亂雍被虜蕭呼雍曰願死君
前義不受辱賊俱殺之詔贈蘭陵縣君

李氏光澤人成一元妻至正末江西寇陷光澤邑民依鳥

君山之王隆官以居鄰寇乘機入山剽掠李氏被執驅迫以前行經龍牀石崖深壑處李氏力曳所縛繩與賊俱投崖死

杜原妻蕭氏安陽人元末兵亂原挈家之官真定途遇群盜蕭謂其夫曰汝當避難我自爲計遂投河而死

李銳妻何氏龍泉人至正中避兵于邑之繩門巖賊至被執欲污之乃與子榮兒女回娘俱投崖而死

韋寅妻王氏名惠高郵人元末城將破里中乘亂恣掠惠匿薪中盜發薪惠恐辱給賊以薪下有金得脫赴井死年二十四姑夏氏俯井悲慟亦自墜有女奴始笄亦赴井死

陳氏福寧州人林克威妻也元季亂兵屠戮克威家陳氏扶姑抱子走匿山谷中後潛歸母家時年方二十有四母憐其少欲使改適令人微諷之陳氏泣曰棄老穉而他適禽獸所不忍爲也毅然勵操終養其姑撫成其子年八十三而終

葉氏大同人張思孝妻元季爲貊高兵所執以不受辱見殺其婦劉氏僵壓姑尸大罵不已兵并殺之後家人驗其尸婦姑之手猶相持不舍

陳九淵妻袁氏分宜人元季兵亂邑萬戶王同者聞袁美姿容殺其夫欲娶之袁曰夫爲我死我當以死報遂自

刎

李氏名智貞浦城鄭全妻九歲母卒哀慟欲絕不如葦三年父以許全後客邵武邵武豪某其聰慧強納采聘智貞斷髮拒之且數求自死豪不能奪卒歸于全事舅盡婦道泰定間全病歿智貞悲泣不食數日而死元季旌表門閭

蘭氏江西安吉人爲鄭家婦陳友諒部屬鄧平章陷其縣帥某聞蘭有殊色將納之蘭曰帥貴人妾事之無恨然吾良人以禮幣聘妾爲婦者若干年與生二子妾不忍即背恩軍中禮不備請持一月喪乃爲帥婦帥許之服未終移兵別縣帥曰吾如汝約今夕諧吾婚乎蘭曰諾旣而帥他之使二卒守蘭曰爲取鷄酒具香火今夕吾

孟志剛妻衣氏汴梁人志剛儒士家貧無子及卒衣給匠者曰棺可寬大吾夫有遺衣服欲盡置其中匠者然之是夕衣祭其夫自縊死

曹德妻侯氏鈞州人德病死侯曰欲守志而時值亂離如此其能免乎遂縊死于墓

奉化陳氏婦以貞節稱者五人初陳元娶竺氏生子侗而元卒竺氏年二十二義不再適侗娶璩氏生子瑞泰二人侗亦以疾夭璩氏年二十六後五十八年卒瑞娶王氏生子通甫而瑞復夭王氏年三十後五十五年卒通甫娶樓氏樓氏甫笄歸于陳至二十六而寡父母欲奪其志泣不從其姑王氏年老事之尤謹姑卒殮葬悉如

禮子四人長養才娶樓氏生子孟雍孟熙而養才遇疾不愈方卒時樓氏年二十六亦守節不移

李忠妻王氏忠偶溺死王氏求屍得之號痛幾絕旣殮又欲赴水死姑救免還家日夜哭絕不飲食數日自縊死劉氏燕山人幼失怙養壻松江人初不知爲亡卒而自有妻久之會赦壻謂劉曰吾歸松當即還後竟不返劉尋至松壻不復認劉仰天痛哭剪髮自誦佛經行丐于市宿于婆姥家人憐之不乏施因構一室製棺夜卧其中殆五十餘年鄰火劉入棺呼曰器物悉取去乞闔棺以畢吾事于是與室俱燬

李氏餘于人歸邑艾子高苗民猝至被執欲污之大罵而

死

張婦鄭氏淄川人寡居終老孫婦李氏亦有節操詔旌曰
雙節

母丘氏四川人適邑人蕭璩年二十三璩死矢志不二詔
旌其門復其家

相氏朱原方妻安丘人年二十夫卒自縊同葬旌表
王氏馬英妻夏津人英卒王誓不再醮餓而死旌表

張氏文沂州人適王氏夫卒剪髮歛葬後蒙旌表

孫氏三原張德妻德亡孫年二十四誓死靡他子世享亦
蚤卒妻王氏年二十九亦誓不再嫁世享子忠亦早卒
妻劉氏年二十八亦能守義不渝操履清白先後相望

事聞詔旌表其門

焦氏涇陽人袁天祐妻天祐從征死甘州宗族欲改嫁之
焦氏哭曰袁氏不幸三世蚤寡皆守節義豈可至吾遂
廢衆不復言事聞旌表

趙十一妻袁氏宣城人年二十生男甫一歲而夫亡袁勵
節撫成其子年六十二終詔旌表

李義實妻趙氏南陵人二十四夫亡勵節終身事聞旌表
甯天驥妻胡氏青陽人胡及笄適甯踰年夫亡守節六十
餘年卒事聞旌表

步善慶妻陳氏善慶贅于陳早卒父曰汝年少當爲汝求
配陳不答即自經死事聞旌表

李聚妻王氏獲嘉人孝子全之母有淑德生一子二女夫卒時年二十四勵志不貳人莫能奪拾穗紡績撫育孤子總管許公以聞旌表其門

李彬妻張氏新安人年十九夫亡生一子二歲其家憐其少寡欲嫁之張誓不易操有司以狀聞旌其門曰堅節劉應麒妻郝氏建康人初應麒卒子方孩時祖姑王氏以夫虎爲統帥死敵不出戶者數十年姑郝氏亦自二十歲守節應麒妻上事二姑惟謹而志操尤勵人謂三世貞節云

隴西李茂德聘同郡張氏女年十七歸李氏生子庸甫六歲而寡舅姑憐其少欲嫁之使左右諷之即引刀截髮

以見志乃止茂德之弟仲德亦早卒其妻張氏年二十有八生子慶方亂亦誓不再適從弟希賢妻陳氏年二十有四希賢卒時其子慶方孕四月守志益堅一門三婦以貞白聞

薛穀妻馬氏名瑞香湯陰人幼讀孝經列女傳通大義父母鍾愛擇壻得穀贅之生一女穀拙于家事婦翁怒責穀遂離去踰三年父母憐其幼諭令再嫁俛首不答乃書女無再醮之義以告父母不從乃投井死留片紙于懷中書謝別父母之辭聞者傷之御史王構作傳

齊關妻劉氏河南人關應募爲千夫長戰死劉家貧守節有來強議婚者劉紿曰吾三月三日有心愿償畢當從

所言至日徑往彰德天寧寺登浮圖絕頂仰天曰妾本河內名家女夫已死不敢失節遂投地而死

燕山項氏其夫江南人行賈燕薊間聘項與居未幾夫死項時年二十奉柩回江南誓以夫餘貲養姑以自終比至姑已改適勵志孑居以守夫祀盱江李宗閔列其事而賦之曰少無依倚老何堪白髮婆婆亂不簪憂裏尚思江北好悔將夫骨葬江南

傅氏紹興諸暨人年十八適同里章瑜瑜爲苛吏脅軍興期會迫死道上計至傅氏蒲伏抱屍歸號泣三日夜不忍入櫬屍有腐氣猶依屍呵含日冀復甦旣入棺至嚙其棺成穴及葬投其身壙中母強挽以出制未百日母

欲奪志語聞遂大慟連日不食母囑侍婢謹視之閱數日給婢吾當浴若輦理沐具俟予旣而失所在明日婢汲井見二足倒植井中乃傅氏也

鄭氏四節婦歙人鄭千齡妻洪氏年二十六而寡始終貞白子二曰王曰璿王死節妻程亦死之妾何矢志撫其孤璿早卒妻王亦不二志云

汪氏休寧人夫亡監郡欲取之託媼探其意汪罵曰監郡風化之首而爲此何以見吏民乎守節終其身

管王田妻梅氏兵破城夫婦匿小民家兵入夫逸去梅爲賊所得將活之梅乘間赴水水淺不得溺至以刃臨之不爲動復以鉤力挽不肯升乃以戈戡其腋死

武食事妻陳氏武卒父母迫之再嫁陳對鏡以墨刺面爲
痛念夫情四字矢不更嫁

龔氏三女晉江人長曰益適柯允中允中從戎而歿益年
二十五次源能誦說古賢女言行年十八適張仁仁早
卒源年二十二欲死相從時其孤尚幼家人苦諭以宗
祀無託而止季婉年十七適劉允正允正早世婉年十
九携二孤躬負土築墳三女俱早孀而舅姑皆先卒筑
筑無依喪終咸挈孤依父以居甘貧自力誓死不二
楊貞妻趙氏濱州人夫卒旣葬不食死

惠高妻李氏濱州人夫卒自縊

觀音奴妻羅氏濟寧州人夫歿王事投水死

任仲文妻林氏寧海人家貧早寡守節不移年一百三歲而卒

劉應震妻范氏合卺之夕應震疾作不能成禮未幾卒服除母欲改嫁不許母曰未配非改節也對曰名在劉氏家廟且有姑在姑歿復有以爲請誓死不易

平章闊闊歹之側室高麗氏有賢行平章死誓弗貳適正室子拜馬朶兒赤悅其色欲妻之而不可得乃以其父所有大答納環子獻于太師伯顏伯顏特爲奏聞奉旨命拜馬朶兒赤收繼小母高麗氏高麗氏夜與親母踰垣而出削髮爲尼

丁氏名月娥西域人軍職馬祿丁之女歸蕪湖葛家已而

南北兵起，僦居郡中，無何，汚寇奄至，城失守，月娥慨然曰：「吾替纓家女，何忍見犬豕耶？」即抱所生女赴水死。婢媵凡九人，皆爭入水，無後者。

范氏，汝陽縣民莊十一妻也。夫亡，范年二十七，舅姑老子幼，家貧，所親勸其他適，截髮自誓，縫紵以養舅姑，恪守婦道，年八十，事聞，詔旌爲貞節。

張訥妻劉氏，藍田人，訥爲監察御史，早卒，劉守志不二，河東受兵，其二子衡衍俱以事出外，劉度不能自脫，遂與二婦孫氏、姚氏同縊死。

吳中妻劉氏，安陽人，夫亡，劉旦夕號泣，人不忍聞，未半歲生子，一日服練歸寧，父母欲更適，劉曰：「夫亡子在，焉可」

他適况舅姑年老無人奉侍自是不復歸寧比舅姑歿
送終盡禮教子成立年八十四卒有司以聞旌表其門
何氏衢州龍游縣儒家婦至正間爲亂兵所掠裂帛題詩
曰失身無補君王事死節難酬夫壻恩題畢投江而死
劉氏大同人至正戊申秋與姑華氏俱爲河南軍帥所掠
苦被驅迫華謂劉曰汝芳年奈何劉曰有死耳華曰勿
無刀縊無索柰何劉曰當激賊怒以就死耳遂相與大
罵遇害時年二十二嘗賦庭栢以自况有旣保歲寒心
不在遐年壽之句

孝節婦崑山人水得之妻年二十夫亡誓不嫁或勸之曰
無子老將何依婦拒曰夫者天也天可二乎夫死無子

命也欲自經其兄子覺之得不死後同籍繫獄婦當連坐任事者脅之曰若適人可全婦曰吾不忍以危難棄禮義雖死無悔事聞詔旌之

韓氏保寧人年十七遭明王珍兵亂慮爲所掠乃服男子服混民間旣而被虜居兵五六年人莫知爲女子後從王珍兵掠雲南遇叔父贖歸成都以適尹氏人號貞女柳氏女嘉興人父爲縣吏至正末紅巾賊陷嘉興女時年十八與其父母同竄匿爲賊所得驅以行至河許給欲結襪賊不知防遂投水而死郡人金綱作記表之

羅氏名妙安弋陽人能暗誦烈女傳年二十歸鄭琪以功擢鉛山州判羅封宜人至正末信州陷羅取所佩刀淬

礪令鉅珙問何爲曰時事如此萬一遇難爲自全計耳已而兵至自刎死

尹大中妻黃氏穀城人至正末爲賊所虜欲辱之不從分其尸

黃氏崇明人季富妻至正初海寇入境掠士女登舟者二十餘人黃氏義不受辱即投海死時年二十七

王子溫妻華亭人姓諸氏子溫家貧諸以女紅給其服膳畧無愠色元丙申兵劫松江子溫欲挈以逃難諸流涕曰豈可以我一婦人致累汝耶汝第去我自爲計乃與鄰嫗避於南城陋室中少頃賊入隣嫗皆爲所汙獨諸怒罵不從賊掣刃剖其腹罵不絕口而死

費元琇上海名家女歸廣陸朱氏元至正間從宦江陰盜起因歸寧避亂邑陷苗軍露刃欲私之元琇罵不已苗怒剗之妹元徽有女德歸華亭陶氏年三十喪夫誓死不嫁時號雙節

沈景新母妻平江人元至正中景新調上海吏江浙苗軍大肆殺掠母與婦謀曰吾家素清白義不受辱尋爲苗軍所擒曰你能從我不殺汝婦姑大罵苗軍怒刃其姑縛婦髮馬尾曳殺之

禹氏崇德石門人吳守正妻名淑靜嘗從容謂守正曰方今群盜蜂起萬一不測妾惟有死而已元至正中盜陷崇德淑靜倉皇移八歲女登舟以避有盜數輩奔入其

舟乃抱幼子投河死

茅氏崇明人朱虎妻元大德間虎官都水監坐罪籍其家吏錄送茅氏及二子赴京太醫提點師甲乞婦家欲妻之茅氏誓死不從母子三人以裾連結晝夜號泣形貌銷毀師知不可奪釋之虎故人王大卿等贖茅氏爲永明寺尼憂憤不食卒後虎兄子謙以聞旌表其墓錄付史館

周婦松陽人姓毛氏美姿色至正中隨夫避亂麻鷺山中爲賊所得脅之曰從我多與金否則殺汝毛氏曰寧剖我心不願汝金賊以刀磨其身毛氏大詈曰賊碎則臭我碎則香賊怒剗其腸而去

金氏鄞縣人程徐妻父端學仕元爲詳定使有女名瓊適
澠州同知陳介至正中京城破金氏謂女曰汝父出捍
城我三品命婦汝儒家女又進士妻不可受辱抱二歲
子及女赴井死

徐氏天台人狄恒妻恒早沒徐年十八守節不再醮至正
末避亂牛固山爲賊所執驅迫以前給之曰吾渴甚欲
求水一杯賊令自汲即投井死

卽氏安吉人宋進士朱甲妻甲仕浙東以卽從至元間朱
沒卽護喪還至王山里留居避盜勢家柳氏欲強聘之
卽不從死拒得免家居事姑甚謹姑嘗病卽禱天剖股
肉進啖而愈後姑喪以哀聞大德中旌

湯輝妻張氏龍泉人滇兵亂先移家財出砦夫與姑守之
舅以疾未行張歸供藥膳賊至即以輿載舅行已而遇
賊賊以刃脅之曰從我則生否則死張掠髮整衣請受
刃賊未忍殺張懼汚即奪其刃自刺死時年二十七

臨淄陶國賓妻許氏 齊東柴文志妻孫氏

長清楊惟儉妻任氏 膠州田婦閻氏

行省都事賈訥母劉氏 沔池李四妻茹氏

大名王德政妻郭氏 益都秦江妻馮氏

諸城崔立妻紀氏 諸城王瑀妻鄭氏

昌邑呂義妻岳氏 莒州鄒惟新母徐氏

高密李章妻王氏 嘉祥黃宅妻武氏

朝邑馬宅妻王氏

濰州王實妻傅氏

臨朐巨林妻王氏

臨朐楊原妻顏氏

蒲城党通妻張氏

南樂趙遜妻庫氏

南樂韓德妻楊氏

利津馮母劉氏

濟寧尹貞妻神氏

章丘盛時中妻劉氏

濟寧李鳳妻劉氏

濟南李名妻劉氏

濟寧王德妻秦氏

章丘游貞妻王氏

章丘劉聚妻王氏

臨清宋居讓妻王氏

中興路伯顏妻阿迭的

章丘馬榮妻晉氏

臨淄牟處士妻耿氏

濰州國忠妻鞠氏

鄒縣房天驥妻祝氏

濰州韓敬妻周氏

續文獻通考

卷之七十五

三十四

三百三十五

南樂睢伯顏妻劉氏

長山尚敬溫妻 氏

章丘趙讓妻王氏

樂安聶貴妻劉氏

即墨張約妻宋氏

建昌王時清妻李氏

寧海姜思敬妻閻氏

城武王宅妻苗氏

高州蕭又妻趙氏

衛輝安寅妻陳氏

河間王成妻劉氏

冀寧李孝仁妻寇氏

奉元李郁妻崔氏

濮州王義妻雷氏

南陽邵二妻張氏

懷慶阿魯輝妻翟氏

龍興張仁興妻鄒氏

樂安王仁妻劉氏

樂安蔣恒妻劉氏

茲陽劉洋妻史氏

淄川王德用妻張氏

淄川公孫願妻蘇氏

淄川王婦胡

吳江方伯洋妻江氏

益都張崑妻丁氏

壽光張婦仵氏

壽光掌谷稅妻劉氏

壽光朱行義妻赫氏

壽光蔣婦毛氏

高苑楊富妻崔氏

昆明皇甫璇妻楊氏

昆明桑知州妻李氏

昆明景縣尹妻王氏

東平州刺臺妻蒲氏

東平州楊三妻張氏

陽穀劉玉妻王氏

新昌蔡玄通女

高安胡氏

德興葉起巖妻方氏

鍾離程寬妻孫氏

魯山王大妻張氏

漢陽劉通判妻梁氏

古田李仕遠妻余氏

燕人張買妻王氏

馮翊王義妻盧氏

睢陽劉澤妻解氏

大都潘居敬妻陳氏

大同李文寶妻張氏

河南閻遂妻楊氏

大都王成妻高氏

冀寧梁世明妻程氏

大興郭仲安妻李氏

昌樂尚成妻劉氏

辰州萬戶圖格里不花母石林氏

金州杜祖隆妻張氏

大都劉德仁妻王氏

大都同知忙兀秃魯迷失妻海迷失

山丹州郝榮妻李閏

甘州阿兒思蘭免古妻忽都的斤

濟南馬萬妻晉氏

大都右警巡院胡德妻曹氏

大寧李天麟妻章氏

沁州劉煒妻張氏

任城王德妻秦氏

金華吳墳妻宋氏

廬州高仁妻張氏

甘州岳忽南妻失林

孟州完顏帖哥住妻李氏

良鄉章安妻張氏

永城縣民張氏

奉化舒燕妻徐德柔

奉化朱春妻舒淑初

奉化張紹庭妻汪本奇

慈谿方婉妻翁淑真

慈谿沈景莊妻顧氏

慈谿沈則妻王氏

以上皆守節被旌行實未詳附著于此

雷州朱克彬妻周氏

大都賈巖妻王氏

大都賈哥妻耶律氏

曹州鄭臘兒妻康氏

陝州陳 妻別娥娥

大同宋堅董妻班氏

大同李安童妻胡氏

晉州劉恕妻趙氏

冀寧王思忠妻張氏

饒州劉楫妻趙氏

東平徐順妻彭氏

大寧趙雁兒妻安氏

大寧陳恭妻張氏

大寧武壽妻劉氏

大寧朱敬先妻謝氏

大寧撒里妻蕭氏

大寧何千妻桓都賽兒

古城魏貴妻周氏

任城郭灰兒妻趙氏

棗陽朱某妻于氏

益都楊和卿妻尼氏

益都劉朝綱妻段氏妾宋氏

安丘朱元方妻相氏

葉縣王保子妻趙氏

興州民妻魏氏

藥州裴 妻董貴哥

真定民妻周氏

冀寧民妻魏益紅

成都張保童妻郝氏

利州高塔必妻白氏

河南張妻盧氏

蒙古泰木妻阿不察

蒙古相兀孫妻脫脫真

以上並以死殉夫蒙褒表或賜錢贈謚行實未詳附著于此

續文獻通考

卷之七十五終